

卷之二



寧波府

在省城南
五百里

領縣五

郡始于唐高祖爲鄞州開元二十六年改明州以四明山爲名 國朝初設明州府鄞人單仲友以

能詩徵至南京因奏本府名同國號請改之上喜

曰彼處有定海海定則波寧遂改寧波府○府治

卽舊寧波衛址唐之明州宋之奉國軍慶元府皆

設于此有老香堂在府治後園北植桂百本取山

頭老桂吹古香之句以爲名宋丞相吳公潛判慶

元時建又郡圃北有古檜數本其狀甚奇公潛移

植于蒼雲堂舊扁尚在前守章大醇建歷陽張卽

之書○蔣家花園在府治東南南宋蔣曉建今廢王
巨詩云採蓮橋下路皂蓋拂雲來塵壓隨軒雨風
生避暑臺酒綠佳客盡花爲使君開共話西溪舊
相忘此日杯○倪家花園在府治北元倪萬戶建
今屬蓮塘柳岸人家○桃源洞在帥府後圃之北
今爲海道司中有佳趣亭集春亭容與亭悉繚以
步廊雖雨雪不妨行遊宋韓璉建後燬于兵燹至
今猶稱桃源洞云○四明驛舊在府治內卽宋時
通判東廳址元徙建于城西南月湖中以故涵虛
館爲驛有衆樂亭宋熙寧中丹陽邵亢記王安石

詩使君幙府開東部名高海曲人知慕艤船談笑
政却成洗滌山川作佳趣平泉浩浩銀河注想見
明星弄機杼載沙築成天上路投虹爲橋取孤嶼
掃除荆棘水中央碧瓦朱甍隨指顧春風蒲城金
板舫來看置酒新亭上百女吹笙綵鳳悲一夫伐
鼓靈龜壯安期羨門相與游方丈蓬萊不更求酒
醕忽跨鯨魚去陳迹空令此地留○甬東巡司在
府西北按左傳哀公二十四年越滅吳請使吳王
居于甬東杜預註云句章縣東海外洲是其處韋
昭註國語以爲東澹口外今名澹港輿地記以定

海有大浹港卽今之舟山舊爲翁山縣治所○句章城有二其一在慈谿城山渡之東卽越王勾踐所築者一在府城南六十里宋武帝改築于小溪鎮因名之爲句章鄉者○句章城一名官奴城舊圖經云漢光武嘗至越爲賊所困因牧奴得免旣定天下以奴爲鄞令封鄞爲牧奴縣城爲官奴城又十道志云宋武帝微時避吏于鄞與人奴名桂者善因匿之爲吏所窘奴乃耕于田以土覆武帝得免後立官奴城以報之掘土築城處名官奴池卽舊治鄞山之城也鄞山詳鄞縣下其謂光武帝者于史無所據而宋書孫恩寇上虞時劉裕戍句章疑故爲宋武云

鄞縣附郭

鄞之名始于夏禹時有董子國因其境有赤董山在今奉化縣東五十里產赤董草故名薛燭曰歐冶子與越王鑄劍破赤董之山卽此董加邑爲鄞國語吳更封越王勾踐東至鄞則鄞之始也今附郭之鄞縣乃古鄞邑舊治鄞山在縣東三十里十道志云海人持貨貿易于此貿加邑爲鄞故名陸雲集云秦始皇南巡會稽留鄞縣三十餘日是鄞

縣已置自秦矣漢及六朝通如之隋則合鄞句章
鄞併爲句章縣治小溪鎮而鄞始廢唐武德初復
句章爲鄞大曆六年以海寇袁叢之亂始徙今治
長慶元年并徙明州治于此而鄞爲附郭五代時
吳越錢氏改今名曰鄞○宋慶曆中王安石爲鄞
令築有讀書臺臺傍雜時花木今爲按察分司遺
址僅存荆公詩云收功無路去無田竊食窮城度
兩年更作世間兒女態亂栽花竹養風煙題署內
西亭詩云山根移竹水邊栽已覺新篁破嫩苔可
惜主人官便滿無因長向此徘徊○會別亭在城
西亦荆公所建其詩云西城路居人送客西歸處
年年借問去何時今日扁舟从此去春風吹花落
高枝飛來飛去不自知路上行人欲如此應有重
來此處時○三江亭在城東門北宋天禧中郡守
李夷庚嘗寓于此後守潘良貴建亭自爲記云大
江橫其前群峯拱其外島巖出沒寒烟有無浪船
風帆往來天際而州之井屋左顧右盼盡在目中
○翠鎖亭在江岸謝翱有翠鎖亭避雨詩自注云
亭有魏王妃所題字尚新王嘗以皇子成德軍節
度使鎮明故妃至其處詩曰客有游山衣着久如

薛荔行行萬翠亭忽作風雨憇仰面無所覩梁間
 有題字問此何人書婉婉有弱氣云昔魏王妃學
 書似李衛乘雲到此山灑墨在空翠塵風吹土花
 條忽景物異疑此夢與仙不類人間世○攷三江
 之名曰鄞江在城東北二里卽甬江也南接奉化
 江西接慈谿江三江同會于定海之大浹東入于
 海○江之桃花渡北天成高阜九十有九獨一阜
 半入于江其曰北渡者卽奉化之北界也唐許渾
 曉發鄞江北渡詩南北信多岐人生足別離地窮
 山盡處江泛水空時露曉蒹葭重霜晴橘柚垂無

勞促歸楫千里有心期○慈谿江源發嵒縣之剡
 溪至此始大其灘積高險行客往來皆用裝束因
 建亭曰嵒亭南齊僕射張稷生子于此因名曰嵒
 ○甬江樓在靈橋門內宋楊芾建呂祖儉記畧曰
 船務東負郡城乾道之元監務事楊公仲章剡樓
 于其上距今二十年而樓名未立蕪穢弗治通守
 丹陽蘇公實臨船事暇日登樓望覽其山川之勝
 而一新之因名以甬江庶幾表賢存舊後來者有
 攷焉按靈橋卽東津浮橋也跨鄞江上唐長慶三
 年刺史應彪置凡十六舟巨板其上長五十五丈

濶一丈四尺初置東渡門外江濶水駛不克成乃徙今地方經始時雲中有虹映其上衆咸異之初名橋曰靈現又曰靈建今東城門以靈橋名蓋謂此○城東南里許為日湖一名細湖縱百二十丈衡二十丈周圍二百五十丈有奇其源與月湖俱出四明山一自它山堰經仲夏堰入南門為日湖故又名南湖一自大雷山經林村十字港滙望春橋入西門為月湖故又曰西湖宋元祐間太守劉瑛因月湖之舊而疏浚之復仍其積土廣為十洲曰花嶼曰竹嶼曰煙嶼曰芳草洲曰芙蓉洲曰菊

花洲曰柳汀曰雪汀曰月島曰松島亭閣臺榭上下相映士民游賞四時畢集王旦題十洲閣詩山川如幻閣長秋一鳥飛來伴九洲不礙漁樵雙槳過何妨羅綺四時游雲疑秦華分張去水憶蓬瀛散漫浮禁苑未知湖海樂生納寫取獻中洲○湖傍有澄輝閣周鏐詩云雄建俯空濶下瞻霄漢浮眼將雲冥冥心寄水悠悠日暖鳥飛鏡月涼魚弄鉤行期分此景家在甬西頭○雁湖在縣東北三里桃花渡之北顏公渠之南時有鳧雁來浴故名○廣德湖在縣西二十里晉陸雲書鄞西有大湖

夷堅癸志云自東漢以來有之廣袤數萬頃宋曾鞏記以東七鄉之田錢湖溉之西七鄉之田則此湖溉之凡達越之舟皆由于此舊名鶯脰湖唐縣令儲仙舟更今名其後郡人樓異知此郡奏罷爲田卒不可復○東錢湖在縣東三十五里舊名西湖蓋唐長慶前鄞縣未徙時湖在縣治之西故耳周八十里其中突然一山四環皆水不與陸接名曰霞嶼又有大慈山亦在湖中有大慈寺卽史彌遠香火院也宋錢墳世居湖上墳好學有節槩與同里高友文以談經史相資廓落世務○槎湖在縣西南二十里昔有張氏世居又十五里爲小江湖唐縣令王君照修又十五里爲馬湖相傳賀知章洗馬池今僅如杯大可浴龜鼈○宋王應麟辯小江湖說曰唐志鄞縣南有小江湖溉田八百頃開元中令王元暉開浚民立祠祀之按九域志卽它山堰也今有善政侯王長官祠卽爲元暉而設舒亶引水記曰它山者四明之衆山水所萃一作雨則澗壑交會出爲漫流卽歲旱溪流未嘗絕也王君祠在堰南門但歲久水湮若用引水法爲之尚可復舊今惠光院俗號小江塔院以地里攷之

小江湖正在其處旁有千丈鏡支港尤多小江之名本此而郡城中亦有小江者蓋本靈橋之小江里非小江湖也○它山堰在縣西南五十里先是四明山水直注于江與海潮接鹹不可食唐王元暉疊石爲堰于兩山間濶四十二丈級三十有六冶鍊灌之渠與江截爲二渠流入城市繚鄉村以汲以灌其利甚溥自廣德湖廢而西七鄉之水咸賴于茲度去堰十里有仲夏堰唐太和元年刺史于季友開亦引四明山水入渠後因元暉別置它山堰始廢而不用尚有橋名仲夏橋○它山距四明山百里有奇而四明之水咸趨蓋其水自南沿流皆山也至是始有一山在水北因兩山相對故堰獲成唐亮閣黎詠它山堰詩截斷寒流疊石基海潮从此作回期青山自在行人老澗濶水聲無絕時○左近有錫山葱蒨入雲泉流甘潔隱隆起伏郡治之所蟠結也又有建輿山峯巒十五矗立于前狀如列戟鬱然深秀其下有寶嚴寺又有石臼山山坡圓石可二丈許中有穴似臼世傳葛仙翁煉藥于此山下溪潭深迥不知其底有魚如舟見必陰雨或見龍首枕于山麓又有響岩石壁立下

浸江水水流作聲則岩中苔之唐賀知章嘗居此
名佛影岩以天寒有鸕鷀群集又名鸕鷀岩又有
木阜山環列二十四峯如木芙蓉亦名木坑又二
十里爲天井山上有五井一岩突然下嵌百仞之
淵地僅側足緣蘿可行如此者數十步至下井之
傍石皆光潔如龍物常行久而熟之之狀又行三
里至中井又三里則上井愈入愈險餘二井益險
絕人跡罕到故舊志但云三井耳又有灌頂山山
下直上二十里方至頂有普淨禪院又十里爲雪
頭山上有龍湫名胡家聖井又二十里爲躊躕嶺
山路險峻過者必每躊躕故名明叅政王樾躊躕
嶺詩秋日澹平蕪登攀興不孤祗疑盤谷道還是
輞川圖嵐氣諸峯合溪容衆壑殊何人乘款段四
顧爲躊躕○又五十里卽四明山山有七十二峯
高一萬三千丈周廻八百里道家以爲七十二福
地上有方石四面如窓中通日月星宿之光故曰
四明山西連春峯起狀如奔牛曰奔牛山中有三
朶峯鼎足而立漢張平子所居石室尚存西南有
五朶峯狀若芙蓉五峯相望各去六里其中央卽
四明山心也又東一峯高六里周十里峯南一岩

高一丈深七尺中有石穴出泉流入黎洲穴生其草及古杉松其西一峯高四里南有石室下有石枰相傳仙人劉阮居之又南一峯高三里有石壁壁出數穴生石乳又北一峯高四里峯頂有天井吐吞雲氣其山四面各生一木東梓西松南栢北檉不相揉雜頂極平正山南聳峯有七十狀若驅羊淵源十丈神螭所潛時吐靈氣如樓閣山麓一澗南流百二十里入于鄞江而縣東三十餘里之龍山鹿山陽堂山賀山橫舉山同谷山皆四明之支也龍山者山勢逶迤狀如游龍故名鹿山相傳昔有鮑郎射鹿于此及視之則石也鹿山南爲陽堂山四面陡絕中有鮑郎墓及祠又南爲賀山古鄞縣以此名賀山東二里爲橫舉山又一里爲同谷山以東西兩舉同一谷口故名其山崔嵬嶄巒靈秀融結內有三嶺一曰石城通定海之深舉一曰魚山通定海之大礮頭一曰長山通小浹港先時山麓與海相際海中百貨來此貿易以故谷口舊名後塘街有鄞縣城遺址又有都巡簡司今爲青山行祠俗名寶幢廟西去半里許曰下庄乃宋泗坊司也至今土人掘地嘗得甕甓之類○同谷

山東爲阿育王山昔阿育王現靈建寺其下因以
名山山腰有佛足跡入石二寸餘有極目亭望海
中山如丘垤有舍利塔相傳如來真身舍利八萬
四千塔之一也有宸奎閣廬山僧懷璉以藏宋仁
宗問荅手書及所賜詩頌學士蘇軾爲之銘○玉
几山在阿育山前橫陳如几故名山南有白雲山
宋寶慶間建顯忠寺以賜趙希言廢址尚存又五
里爲白石山玲瓏峭拔上有神仙石碁枰一名火
石海舶見者以爲光恠又十里爲筲箕山卽小白
嶺也元朝請大夫盧元因耽太白之勝結廬居焉
山南懸崖瀑布名水簾洞上有鬼谷先生祠又五
里卽太白山頂有龍池雲霧蒼勃生于水面麗日
晴霄澄澈如鏡或風振林木葉落無墮池中者其
山最高四時積雪不消故名太白亦謂之南太白
宋理宗書太白名山賜僧子朴云○越五里爲天
童山晉永康中僧義興卓錫于此有童子給役薪
水久之辭去曰吾太白星也上帝遣侍左右言訖
不見太白天童之名實昉于此王安石詩溪水清
漣老樹蒼行穿溪樹踏春陽溪深樹密無人處惟
有幽花渡水香舒亶詩何年杖錫此徘徊天上真

官爲我來芝圃鶴歸香火冷石碁空鎖舊花臺○
鎮明嶺在治南里許高五尺宋天禧中郡守李夷
庚以土增高至數丈嶺之南有寶雲寺又二里爲
舟宿渡又七里爲銅盆浦渡有龍潭時見白蛇橫
于江面則雲霧晦冥邑人相傳以爲月湖白龍所
遷徙也又十里爲平楚亭在櫟社之陽今名水中
洲洲當水三合處北通桃源西接它山東南流入
郡城亭已廢處士沈汴詩云不見平楚亭荒洲但
流水欲問桃源春夢落漁舟裏○元末東甌高則
誠避亂主于櫟社沈氏之樓居因作琵琶記記成
時清夜按拍歌舞几上蠟炬二枝光忽交合因名
曰瑞光樓又十五里爲隱學山又十里爲陶公山
俱臨東錢湖隱學山相傳周末徐偃王棲隱于此
其下有放生池徐本原詩周穆日盤游九鼎幾欲
移造父御八駿萬里觴瑤池邦家嘆無主神器將
安歸諸侯悉朝徐瑞應維其時忽聞黃竹歌拒戰
非所宜避位向吳越直至東海涯德義感人心臣
庶爭相隨山以隱學名上有棲真祠翁仲翳草萊
再拜空噓嘻遼東鶴不返塚墓何纍纍子孫繁且
衍譜牒能相貽零落千載下惻然起遐思○陶公

山世傳陶朱隱此有釣魚磯在焉宋寶慶三年守
胡榘嘗建烟波館天鏡亭于上今廢國朝隱士洪
性詩霸越平吳此息機蓑衣終日坐漁磯一竿風
月高名在千古江山舊事非春雨荒臺蒼蘚合夕
陽古渡釣船歸探竒欲試登臨興流水無情白鷺
飛又稍南爲姜山平原崛起有石洞三其一最大
曰後岩中可坐數十人洞後又一小洞其上有穴
形圓如月仰可窺天與姜山對峙者曰茆山上有
一葑以竿測之其深無底又十里爲大梅山蓋梅
子真舊隱也山中有石洞仙井藥爐丹竈遺跡俱
存又十里爲金峨山高出衆峯乃府治之遠案宋
舒亶詩叱咤滄溟雪浪空鯨鯢騎去杳無踪煉丹
井上春蕭索知在蓬萊第幾重

慈谿縣

在府西北
六十里

慈谿舊曰慈溪我永樂十六年令有失印者請得
更鑄恐所失之印覆出爲姦故更印文從谷其溪
舊名大隱在今縣西南三十里漢邑人董黯早孤
事母盡孝母疾嗜大隱溪水遠不能常致乃築室
溪濱板輿就養厥疾以瘳因名慈溪自隋以前爲
句章縣地唐初爲鄞縣地開元二十六年始析置

今縣有浮鯿山在城內縣治負焉北西東三面瀦
為湖山浮其上形卑如鯿故名北山之湖南北西
距山縱廣十六畝湖中有嶼宋乾道間令陳壽彭
建亭于上扁曰環碧今俗名縣後湖又名小湖○
闕湖在縣東北一里闕峯山之上唐縣令房瑄于
山下鑿湖以溉民田廣袤一百五十畝三國吳闕
澤世家于此故山曰闕峯湖曰闕湖澤字德潤又
曰德潤湖澤後捨宅為寺名普濟寺又以普濟名
湖澤少好學家貧為人傭書以供筆札長事孫權
歷官太子太傅其容貌若不足而荅問不窮虞翻
比之漢揚雄董仲舒云○永明湖在縣西南一里
大寶山之下唐儀鳳初邑大夫呂珂建有寺高宗
賜名大寶因以名山宋大中祥符初改名永明今
湖已湮 國初僧一覺者精脩釋教尤善詩有寒
泓稿與太子正字桂彥良倡和一日

太祖問與誰游彥良以一覺對因誦覺詩乃稱善
而和之云上人侶影處幽林紫竹寒潭映水森草
舍半間雲外月松窓一榻谷中心玄談靜夜風生
石頂禮清晨日吐岑有客扣禪曾問道昂昂寂寂
悟機深遂賜彥良歸里傳宣又有圓詮弘闡皆永

明寺僧兼諳內外典能詩名重一時○花巖湖在縣東南十里唐刺史任侗脩築凡十七頃羨四十餘畝五代僧師訢結屋持戒于此常有白龍聽經因名白龍院又五里有蓀湖多產香草故名僧圓遠剏菴其上講演經教戒行清苦及示寂舌生蓮花○鳧磯驛在縣南二里房次律建舊名鳧磯館以地隣江渚鳧雁之所翔集也後令崔熙復新之周鏐爲之記而系以詞曰鳧之來兮日暉暉江魚潏兮秋正肥清波弄影兮下雲磯行與仙人兮駕言歸鳧之去兮月團團雲淡淡兮烟水漫古人已遠兮坐長嘆樓高夜永兮空闌干又八里爲橫山上有齊虞胄墓胄好學不怠仕至散騎常侍今呼爲常侍墓又十里爲驃騎山舊名靈山漢驃騎將軍之子意歷中書郎退隱于此採山釣水以自適人皆賢之遂以其父之官名其山按志云驃騎山在縣東南二十里又十里爲塔山一名東山劉鍾詩曰有約出郭登東山白雲片片相與還水流苔滑一溪碧風吹帽落雙鬢斑野老對酌興何逸道人高詠心自閒蒲徑黃花醉眼豁恍然身世非塵寰○石魚山在縣西五里又五里爲石櫃山俱以

形似而名又有石井石床石瓶之屬俱在縣西二十里雞鳴山之上雞鳴者以山中嘗聞雞聲若仙家然又十里爲虎脾山以山形聳踞如虎脾也唐邑人司農卿張無擇葬父于此負土結廬三年不櫛絕水漿者七日因感醴泉芝草生焉又五里爲鳳岩山又五里爲龜子山亦以形似而名又十里爲雨微山山上有雲氣卽雨邑人以此爲驗名雨微後避宋廟諱改爲微又五里爲夜飛山相傳此山自蜀中飛來蜀客識之其山出茸草靈藥又五里爲太平山山下有村與湖皆以太平而名孔臯會稽記以爲四明之支隴今其地隔一大江似非然○雙頂山在縣西南七里兩峯並峙屹立平野又八里有城門山在江渚巉岩夾壁狀若城門又以宋城門校尉陳詠之所葬也其下有廣利橋宋寶祐年郡守吳潛建慶豐驛于橋西今廢又五里爲釣魚山上有釣臺世傳謝靈運釣魚于此下有石棋枰潮涸乃見其傍攢青擁翠秀拔于鶴洲鳧渚之上者蘆山也又五里爲大隱山夏侯魯先地志云大隱南入天台北峯爲四明東麓昔謝靈運採藥之所晉虞喜嘗隱焉三召不起故以大隱名

其下卽大隱溪又十里爲車廐山會稽記云句踐于此置廐停車秣馬遺跡猶存今設有車廐驛地名石臺鄉又里許爲勾餘山以在句章之西餘姚之東而名山海經云句餘之山多金錫少草木者也○大蓬山在縣東北三十里又名達蓬山秦始皇欲從此航海達蓬萊山故名山上有岩高五六丈左右二岩屹立如闢雞名闢雞石有石穴深四丈餘岩上有三佛蹟名佛蹟岩多產香草又有香山記云岩谷流香卽大蓬山之支也宋周鐸詩靈山名大蓬香水靄蒼荀龍祇久覆護雲物翳深谷拂衣向劫中神芥斲蒼玉至今天人尊靈蹟印金粟頗聞開士讖飛錫隱岩麓坐令湖海間香供走川陸巍巍虔報地色相儼金屋緬想舊巾鉢猶能慰心目籃輿訪蓮社一笑欣自足撫事動幽尋疇能念榮辱松爐裊如見餘力付棋局更覺夢中身脩然百無欲○五峯山在縣西北三十里山有五峯亭亭相峙其下兩崖屹立如門又十里爲雙峯山宋末邑人姚登孫隱居于此登孫十歲能文窮究經史爲文淵奧宏博超絕蹊逕國朝桂彥良詩下車晨過杜湖嶺喜見壁立之雙峯十里松風奏

韶濩一泓秋水潛蛟龍仙禽古樹集梵刹細草幽
花迎竹筇齋餘宴坐山閣靜夜深隔屋聞疎鐘○
又五里爲五磊山五峯纍纍相比若聚米所成其
南兩崖如門以通出入邑人曹漢炎詩伊軋藍輿
入暮雲青山應認舊時人竹深殘雪猶藏臍溪煖
枯梅賸得春瓦甕碧醞初熟醞地爐紅蕪半枯薪
分明身到桃源境隔斷人間瀕洞塵又五里爲松
浦山其下有松浦巡簡司又里許爲丈亭渡按志
云慈谿江源自紹興府屬餘姚縣之太平諸山至
丈亭乃岐而爲二其大江由車廐歷西渡經府城
之北出大澹口入于海其小江東南貫縣城中由
驄馬橋出東郭一名管山江邑人王維詩出縣五
十里西來是丈亭江分三派白山拱兩邊青遠樹
雲間塢香蒲雨後汀舟人候潮至飯罷卽揚舠○
又十里爲鶴鳴山唐元和間虞九臯字鳴鶴第進
士鄉人因以名其所居一云山形如鶴翅舒而喙
張有飛鳴之狀其下爲鶴鳴鹽課司又十里爲磨
石浪港二山俱在觀海衛城內而瓜哲言桑嶼箬舉
諸山已際大海中又十里有大忌小忌二山則海
中危石行舟之所忌也今已近岸岸左有向頭山

寧波府志卷之五
如龍頭尾相向狀龍頭以東屬定海龍尾以西屬
餘姚二山捍潮其中漲塗漸與山相接舊有向頭
寨元改爲鎮今設巡司

奉化縣

在府南
八十里

唐開元二十六年析鄞縣地爲四縣而古鄞故地
改爲今縣以其民淳易于遵奉王化故名今治東
五十里有鄞城山山下有鄞城院院卽古之鄞縣
治也今爲廣福寺舊圖經云鄞城山卽赤堇山山
有草曰赤堇故以此名加邑爲鄞漢書註白社里
有鄞城山是矣○圖經云青亭山在縣西三十步

形小而圓土多紅色亦名印山○鳳山自華頂逶
迤東來與印山相連一名含光山越五里卽華頂
山也其上有龍湫水流爲錦溪又十里爲日嶺山
有石如鏡臺道通昌岫水流爲葉家溪宋時封石
嶺夫人祠明太史姚涑詩籃輿追勝覽幽徑覓仙
蹤地接金烏影祠瞻玉女峯松篁分翡翠樓閣隱
芙蓉身在超然處瑤臺此日逢又五里爲白岩山
石色光瑩如玉雪竇之支山也又十里爲大雷山
山極高眺百里外四明之支山也其下爲鄞江有
落星石謝臯羽詩大雷山下鄞江口石濕落星海

涵斗○高公塘在鄞江岸唐武德初設鎮于此本
晉孫興公游四明得棠一本植之後訛棠作塘其
上爲赤泥嶺戴表元赤泥嶺行種桑三年寒得衣
養犢作牛堪輓車生男祗解戀鄉土五日溪船催
父歸行前倉鷓後杜宇去家漸近聞剡語恨身不
作田舍兒騎竹搏泥繞墻戶人生衣飯取裁足呵
奴碌碌徒囊粟獻書覓舉真下策年少奔馳頭已
白君不見燕山萬里客更難赤泥嶺上春風寒又
五里爲丹山在四明之南剡源之三石村上有二
洞如廣廈可容五六十人內一小穴甚深入者行
幾半日聞水聲如雷而返岩罅水流皆緝赤色下
有岩竇風從竇出盛夏無暑是名風洞雲笈七籤
所謂四明洞天丹山赤水者也又十里爲雪竇山
山多奇勝有妙高臺藤龕含珠林錦鏡池石竇千
丈岩瀑布泉龍隱潭諸勝唐時雪竇禪師居之鳥
巢衣褶寂然不動宋理宗嘗夢游一山因繪圖令
人遍訪得雪竇如夢境遂敕名應夢山謝翱夜宿
雪竇下方詩自註云雪竇師剡人住隣支遁買山
隱處其詩曰眠山枕斧柯獨客愛盤阿畏日生塵
夢尋仙到鳥窠下方聞夕磬南斗掛秋河寢服侵

雲卷頰泉通瀑和竇分滄海月禪入沃洲歌此地
 精靈聚中宵弄薜蘿明王守仁雪竇山詩窮山路
 斷獨來難過盡千溪見石壇高閣鳴鐘僧睡起深
 林無暑葛衣寒壑雷隱隱連岩瀑山雨森森映竹
 竿莫訝諸峯俱眼熟當年曾向畫圖看又僧居俯
 瞰萬山尖六月涼風早送炎夜枕風溪鳴急雨曉
 窓宿霧捲青簾開池種藕當峯頂架竹分泉過屋
 簷幽谷時常思豹隱深淵猶自媿蛟潛郡丞李濂
 賦詩十首今錄其二云吾聞妙高臺海涌金芙蓉
 上有萬古苔虎豹留其蹤日月挂天柱烟霞韜石

峯所嗟異僧去寂寞青山鐘又雪山萬年藤歛蔓
 椽為龕禪師與世絕巢卧叅瞿曇夜雨澗邊磬秋
 風雲外庵余訪遠公社思投陶令簪○又四十里
 為黎洲山即四明之西峯晉孫興公與兄承公同
 游至此偶得黎數枚左右環視不見人跡意仙物
 也故以為名山麓有碑刻云周迴八百里二百八
 十峯中頂五峯狀如蓮花近星斗有坡曰響石坪
 又五里即四明山○玉几山在縣南三里又十里
 為卓筆山俱以形似而名又十里為九女山峯巒
 成列如處子之狀宋黃唐詩粼粼新綠起前峯拂

拂垂楊烟雨中安得一簑浮短艇玉麟飛上釣絲
風又二十里爲蓬島山重岡複嶺繞繚雄築登陟
其巔俯視數百里滄海微茫縈帶城邑信若蓬島
之非世間也其旁爲後萊山山谷間有潭徑二丈
餘深廣如之水流縈繞松林金溪二鄉出富潭港
與鎮亭水合而入江又十里爲鮎崎山漢地里志
鄞有鮎崎亭卽此師古註鮎音結蚌也長一寸廣
六分腹中有蟹崎曲岸也其中多鮎因以名山又
十里爲天門山一名蜃樓門宋志作引頭門陶弘
景真誥云天門在鄞縣南寧海北半亞于海卽此
山也瀕海裏港兩峯對峙若天門然東舒岳祥詩
烟樹連天遠漁樵兩地分仙舟滄海路僧錫石橋
雲落日人行少空村犬吠聞誰知隱淪者絕跡在
人群○自鮎崎而東有大銀山去縣城十五里山
上有望海峯邑人孫諤詩有云天上玉麟剖翡翠
空中樓閣闕芙蓉傳誦之者以爲佳句又五里爲
新嶺山其巔生竹高僅四五寸葉皆白色寶慶志
云嶺狹而長凡七十二曲有天然石磴上有窪樽
泉出甚冽杯飲只給一入行者以次取飲不竭又
有亭山筆山俱自青嶺來者去縣二十五里倍之

則鄞城山也○青錦山在縣治後名蓮花岩又里許爲塔亭山上有布袋和尚塔故名其鉢孟佛跡尚存又十里爲金鐘山以形似而名又十里爲漢城山其頂平曠可容數千人無荆棘叢木居然堡壘之形又有赤莧山夏侯曾先地志云上有磐石平坐千人秦始皇遣徐福求神仙至此或云昔有赤莧仙人居焉又十里爲江口山自四明分支雪竇山東衍而來至此始盡俯瞰長江又五里爲索鳩山絕頂有石狀如此鳥故名又二十里爲九峯山唐開成中高僧惠超居焉草衣木食戒行精苦

今吉祥院有佛牙長四寸舍利綴滿牙根皆師所遺也其地名香栢岩○岳林山在縣東北五里梁大同初建崇福寺於此是時有和尚形裁臞臞臆臆額皤腹常以杖荷布袋凡供身之具盡貯袋中入市見物則乞號長跪于雪中體不沾濡默示禍福輒應天將雨先着濕草履將旱則曳高齒木屐市橋上豎膝而眠一日端坐于寺東廊而逝後有二僧云見之于天台○岳林之水滙于龍溪舊有虛白觀唐開元間葉靜能講經于此忽南海龍神化一髯叟聽講旣而訴曰胡僧以呪力欲竭海取寶

語甚哀切靜能乃書朱墨符遣弟子持往海上救之于是海水復還觀在原上無井遠汲為難至是龍神感其恩乃于觀左穿一渠泉流不絕遂成大溪因名龍溪又一里為廣平湖又五里為仁湖俱宋元間所開三面阻山中環四五里為平地以瀦水○靈濟泉在縣西南舊名包家潭昔有牧童澣衣于泉得巨鰻持歸齎而為九良父失去急往泉所視之而鰻成九節復游泉中每旱致禱得此鰻則雨立至宋宣和中立碑紀其異○安岩山在縣西南三十里舊有四明院山之二岩橫跨澗上中

有大龜廣二尺許每出入風雨隨之又五里有梅山或謂梅福亦嘗至此其西有丁令威丹井泉水隨海潮上下俗名海眼又五里為相見滙溪溪形盤曲鑿山腹為徑繚繞環合久之尚相望故名其山岩石聳峻有古篆刻為溪流所滄涸時始見又五里為石樓山舊志有石如屋兩崖跨澗飛瀑亂下寰宇記謂之石柱山高六百丈與蓬島山相近又四十里有鎮亭山南自天台西連四明漢地里註云鄞有鎮亭山西界于越南跨天台故其鄉名連山鄉山勢極高蟠結數十里山有龍湫又名石

寧波府志卷之五
井潭○桃花坑山在四明山南壁立數仞延袤千
尺石色紅白相間狀若桃花初發故以名之四山
環繞如盤谷中有平田百畝昔隱士竺汝舟與太
白禪師往來飛錫至此居之因留偈云昔是神仙
宅今爲長者居

定海縣

在府東六十五里

唐開元間立明州有翁山縣則海中昌國地今隸
定海卽翁州是也然實先定海而立而定海乃古
鄞縣地其治爲鄞東北鄙元和中省翁山海墺地
置望海鎮不隸于州乾寧初置望海軍于甬江之

海口後更爲靜海鎮因立望海縣五代梁改今名
宋熙寧間置昌國縣于翁山 國朝併入定海○
志云印山在縣東半里地面涌起一石形方如印
故名○梓蔭山在縣東北一里昔于山巔建屏山
堂東北隅石壁陡起下渟澤水壁間有古篆字相
傳宋王安石書又一里爲巾子山宋史張世傑次
定海元石國英令都統卞彪說世傑降世傑斷彪
舌磔于巾子山下卽此與巾子形勢相控者招寶
山也舊名候濤山後以諸番入貢停舶于此故改
今名宋謝翱詩採藥候潮山宿山頂精藍夜中望

海蛟門南去鳥此地望迢迢積濕侵幡黑生寒入
夢飄見燈歸舶夜聞偈解衣朝土植皆爲藥山枝
不滿樵暗光珠母徙秋影石花消擬候槎回漢寧
茸客老遼卻尋徐福島因問秦皇橋于彼看日出
羽旌焉可招○蛟門山在東海中約有十五里一
名嘉門山環鑠海口吐納潮汐有蛟龍穴處時興
颶風怪浪又有虎蹲山屹立海口出此則爲大洋
古稱蛟門虎蹲天設之險卽此○晞髮集云翺嘗
乘舟至鄞望海上島無數其民多卉服過蛟門登
候潮山被髮楚歌歌罷輟復哭思夫子浮海居夷

之義至定海學故石刻盡什泥淖中新刻復闕茸
讀卽怏怏乃汲水洗故刻得紹興間邑令趙所傳
魯圖自云齊梁父諸山川至洙泗間巷里廟社井
墓歷歷如指諸掌遂摹其本歸過浦汭方君景山
與枯人吳思齊率其徒爲講經社得思陵所贊夫
子像揭于庭朔望拜進退興俯殊習乞翺所摹圖
與像對翺喜而歸之且書其後爲之詩曰秋風嶽
下城海客見圖新樹入舞雩里水來浮磬濱東封
餘輦路西狩問虞人被髮逢夫子狂歌作放民○
大浹江在南城外自蛟門海洋分派爲支江向西

沂流七十里抵郡城三港口分流西南六十里至
鄞縣之它山西北二百里抵上虞縣之通明壩輿
地廣記云定海有大浹港卽晉劉裕與孫恩戰退
還處外洲春秋所謂甬東者也又南十二里有小
浹江自竹嶼山海口分派爲支江蜿蜒西流六十
里抵鄞縣五鄉磯下○金塘山在東南海中約半
潮可到周環二百餘里舊爲昌國縣之金塘鄉
國初徙其民而墟之○昌國城在東海中翁洲本
翁山縣唐大曆年廢宋熙寧間復立昌國縣元至
元間升爲州我洪武二十年以其懸居海島分徙

其民僅存在城五百戶隸定海縣元吳萊記畧云
昌國古會稽海東洲也東控三韓日本北抵登萊
海泗南抵今慶元城又云昌國中多大山四面皆
海人家居篁竹蘆葦間或散在沙塢非舟不能往
來田種絕少類入海中捕魚仰穀他郡昔葛仙翁
煉丹于此故山以翁名宋乾道中耕者得一銅鼎
無足有耳耳不穿竅中容一斗其底煤墨未泯識
者以爲煉丹之噐云○志載安期先生祠在昌國
馬秦山舊傳安期生隱此其鄉亦名安期鄉○舟
山館在昌國境內宋縣令趙大忠建○芙蓉洲亦

在昌國境四環皆海懸若洲島官民多植芙蓉故名曰鼓吹山在昌國山之陰曰戰洋者世傳徐偃王既敗不之彭城而之越棄玉几硯于此今有偃王祠山巔平坦如掌可容數百人每風雨晦冥隱隱有鼓吹聲曰補陀洛迦山在昌國東海中約一潮可到其曰補陀洛迦者梵語也華言小白華一名梅岑山相傳爲梅福煉丹處方廣華嚴言善財第二十八叅觀自在菩薩與諸大菩薩圍繞說法于此然世無有知之者始自唐大中間有梵僧來潮音洞前燔十指指盡親見大士說法授與七寶石因結茅以居至梁貞明二年有日本僧惠顰得觀音像于五臺山將奉歸其國舟觸新螺礁蓮花當洋舟蔽不前顰懇禱若我國無緣見佛當從何所建立精藍有頃舟向潮音洞居民張氏目睹斯異遂捨所居築觀音院于梅岑山之陰自山東行西折爲潮音洞乃大士示現處洞上有穴如天窗仰視日星頽瞰海島金沙細軟石罅深黑海濤日夜嘯吼其下又有善財洞以善財叅禮得名巉岩峭嶮表仄中宵崖上珠泉散滴不斷號菩薩泉北轉得磐陀石可踞坐望海外又有龍女洞以龍女

獻珠故有太子塔以元宣讓王所建故又有紫竹林白華嶺梅檀嶺諸勝宋王安石遊洛迦山詩山勢欲壓海禪宮向此開魚龍腥不到日月影先來樹色秋擎出鐘聲浪答回何期乘吏役暫此拂塵埃元趙孟頫詩縹緲雲飛海上山掛帆三日上孱顏兩宮福德齊千佛一道恩光照百蠻潤草巖花多瑞氣石林水府隔塵寰鯁生小枝真榮遇何幸凡身到此間元吳萊紀畧云昌國海中有桃花諸山嵌空刻路屹立巨浸不着寸土天然可愛又有東霍山徐而駐舟于此轉而北有蓬萊山屹立千丈旁有紫霞洞洞門有神仙題墨隱隱可辨抱朴子云古仙樂登名山海上大島如會稽東翁洲者今之昌國也近日屠本峻有遊舟山記即昌國地詳藝文類

象山縣 在府南二百里

輿地紀勝云唐神龍元年置邑于寧海縣界海曲中象山東麓東至大海二十里南至大海三十五里東北至海四十里惟西南有陸路接台州寧海縣界是以舊屬台州至廣德二年方屬明州象山者形肖象也其峯圓聳又名圓峯山腰有泉時有

白鹿來飲逐之卽不見後人因剏亭于其側名曰白鹿飲泉亭○縣西二百步西谷之南有灌木亭濯纓亭及竹間曲水二亭俱宋治平間縣令林旦建其詠灌木亭詩云行行竹間路時此一登臨爲有臨霄幹長垂滿座陰海雲生遠目山月照閒心幸免材爲累無言棄擲深其詠曲水亭詩云岩溜抱山色傳觴何太頻廻看野客醉還笑濁醪醇漢曲人方遠蘭亭跡易陳勞生無足校酣放卽天真○圓嶠亭在縣東三里東谷桃花蹊之南四山盤繞前楫松蘿下俯石礪宋嘉定中縣令趙善晉建○應真亭在煉丹山上前令林旦建嘉定間趙善晉移置于仙掌岩按志煉丹山在縣西一里梁陶貞白脩煉于此其東麓卽西谷也中有石床西麓有篆衣岩岩壁篆書數行了不可識仙掌岩在此山下○縣西北一里有方壺亭在鳳躍泉之南林木陰翳巉巖峭削僅容一亭亦趙善晉所剏按鳳躍泉在鳳躍山上卽象山之聯峯也唐乾符間有鳳翔于此因名○縣境有小睦大睦東殊西殊大韭大薤諸山俱在東南大海中大韭大薤皆其山中所產也大韭山遍地皆雲嵐天霽則蜃氣煥發

樓臺殿閣龍鳳之形變態萬狀寔為奇觀過大薤山則巨浸茫茫一望無際矣○縣西北三十里之白岩下河萬松諸山皆逶迤至蝦蟆背入于海萬松之麓有智門寺大梁李濂詩云秋出越王關叢林牛斗間坐看東海月飛上萬松山有客乘驄至逢僧射蜃還石床如可借終夕聽潺湲○縣南之山最高而且遠者曰天門山漢書謂之東門高二百丈周圍二十五里有昌國衛城故址曰大佛頭山其高海中諸山無與比者周圍百餘里日本進貢以此山為向道入則平曠膏腴耕種甚利事林廣記有東仙原為海中福地即此也大洋之東曰錢塘南曰大睦西南曰東南皆舂船所經自錢塘而北則入定海自東門而南則入温台近大睦則入象山

台州府

在省城東南三百里

領縣六

輿地紀勝云秦置閩中郡今台州之地屬焉至漢武帝盡徙其民于江淮而閩中不復置郡但置冶縣以撫遺民而屬會稽郡東漢末吳分冶縣為東南二部都尉而臨海屬東部太平二年以東部為臨海郡此置郡之始也梁武帝改名赤城郡陳改章安郡隋末沈法興竊據其地立為海州唐武德五年始改台州因郡界天台山而名○郡署有月桂齋唐垂拱四年三月夜月中桂子降芳香味其食之和暢台州司馬孟說冬官侍郎狄仁傑以聞

皮日休詩萬顆珊瑚下月輪殿前拾得露華新至

今不會天中事應是嫦娥擲與人○靜鎮堂宋吳

悅書唐竇常贈李嘉祐出守台州序云雅登郎位

鎮靜方州因取以爲堂名○澄碧亭在靜鎮堂左

廡跨池有水閣○桃源在郡圃守黃營植桃百餘

本放劉阮故事也自爲詩云本自深山老圃來偶

分符竹到天台深山幸可容桃李莫待劉郎去後

栽○一覽亭在舊州治今爲永慶院丁注詩云插

迥飛簷聳凌虛疊砌危四天欄下掛萬象掌中窺

目力不到處雲容無盡時塵塵皆勝事凭檻幾人

知○唐李白送從姪之台州吾家小阮賢剖竹亦

城邊詩人多見重官燭未曾燃興引登山屐情催

泛海船石橋如可度携手弄雲烟武元衡送人赴

台州盧耽佐郡遙川陸苦迢迢風景輕吳會文章

變越謠煙林繁橘柚雲海浩波潮余有靈山夢前

君到石橋杜甫寄鄭虔台州司戶鄭老身仍窺台

州信始傳爲農山礪曲卧病海雲邊世已踈儒業

人猶乞酒錢徒勞望牛斗無計斲龍泉今有戶曹

港鄭虔宅俱在州東一里

臨海縣附

晉太康地記云吳分章安置臨海縣以地臨海嶠
爲名按章安古城在縣東百十五里晉成公綏爲
章安令登赤欄望江製雪賦卽此○宋呂祖說脩
城記云郡城南東西三方岍于江湖秋水時至北
限大江蹙不得騁怒齧堤足生聚凜凜恃城以爲
命○按今郭下惟東湖最著宋汪泌詩臨海城東
湖氣象清且竒無風波色淨千頃碧瑠璃卽此地
也 國初有東湖樵夫不知何許人聞靖難詔到
自溺于湖而死今有像倭作詩吊之云一片東湖
望裏分樵夫日日下斜曛時人未必知名姓孤影

惟應伴水雲屈子歌兮終自溺之推隱矣不湏文
却憐麋鹿山中侶猶勝麒麟閣上勲○大固山在
治西北蜿蜒磅礴狀如屏障舊經云晉隆安末孫
恩寇起刺史辛景休于此掘塹守之寇不能犯因
以名山宋紹興間道士惠德風斲地得晉斷碑有
龍顧山字故又名龍顧隋開皇十一年置臨海鎮
于此尋移縣于鎮所其東南二里曰小固山與大
固相望又有巾子山與小固聯接橫峙江之下流
城內望兩峯如恰幘其頂有雙塔下瞰城郭郊藪
之勝西麓有龍井其脉通海唐任翻詩絕頂新秋

生夜涼鶴翻松露滴衣裳前村月照半江水僧在
翠微開竹房○按郡城西有三江其源一自天台
之闕嶺一自仙居之永安二溪流至四十里合爲
靈江環繞郭郭潮汐至此而止故其流清又名澄
江陸長倩題巾山詩邑屋萬家迷向背江流三面
自縈洄蓋指此也○輿地紀勝云雙岩在縣南十
五里奇峭並峙州設與之相對又五里爲聖岩在
錢柱山頂號稱險絕舊傳有神躍馬于此又名躍
馬岩至今石上有馬蹄痕又五里爲白岩孤秀嶙
峋林木鱗次以其多白石故名或以其有龍湫水

如白練也又五里爲蓋竹山一名竹葉山山有石
橋龍形龜背架于壑上兩澗合流橋下洩爲瀑布
有石室香爐天門三峯有長耀寶光洞洞淵集以
爲第十九洞天有飛霞石舊傳仙人上昇于此石
累三層牧孺戲以手搏之不墜抱朴子云可合神
丹惟大小台華山少室山蓋竹山無山精木魅之
擾卽此○日山在縣西五里以其面東朝日視諸
峯獨高故名上有顯孝南山寺宋章得象送梵才
大師詩京寺棲禪久南山去路長蓋梵公爲南山
寺僧云又二十里爲清潭山清潭溪之水出焉流

爲小溪東注于江夷堅志云舊有陂廣十餘里宋淳熙歲大水推一山納陂中山之大小正與陂等林木宛然又五里爲石塘山上有石峽飛泉注此塘中相傳水底有石柱天日開朗其柱卽明又五里爲太平象鼻二岩輿地紀勝有太平鄉其岩與洞皆以此名泉瀑飛垂有石室石枕石床石杵之屬象鼻者謂其形似之又二十五里爲常風山山有穴風自中出故名山巔平行良疇千頃潭瀑沾漑旱不爲災曰燈壇山山有石壇每陰雨有光現如燈曰天門山高數千仞旁有香岩石井釣臺白

竹岡西麓有閬風臺宋王士弘詩碧落簫音隔彩霞閬風臺見地仙家手携青杖萬年竹鬢插錦桃千歲花月上高松留白鶴雲封神洞毓丹砂中天絕頂無人到流水桃源莫泛槎○白鶴山在縣東南二十里上有深湖中有磐石前有石鼓俗傳石鼓鳴則兵亂昔有白鶴飛入會稽雷門鼓中擊之聲振洛陽卽此山也郡國志云漢末有徐公于此山成道控鶴騰空而去故名又有白鶴山在西北六十里其水傾注遙望如倒掛白鶴故名按臨海記白鶴山中有深湖魚大如二百斛舟脩可二丈

疑卽龍云○許孝山在縣北四十五里舊傳有許
姓者居喪至孝每一慟則群鳥悲鳴因以名之○
東掖山在東北四十五里舊經云天台之左掖也
有隔塵洞○括蒼山在縣西南四十里唐天寶中
改名真隱山高一萬六千丈周三百里與仙居山
相接舊經云王方平居崑崙往來羅浮括蒼卽此
有仙館土人謂之黃公客堂兩邊有石步廊觸石
雲起崇朝必雨有四竿筋竹風吹自垂空拂石皆
淨石壁上有科斗文不可識每春月常聞鼓吹簫
笳之聲○石樓山在縣東六十里石岩層累望之
如樓故名又十里有中峯取安仁院東接中峯語
也又二十里爲東刊山以禹到此隨山刊木而名
山極高遠亦名天柱山又十五里有石鼓山上有
石如鼓兵興則先自鳴漢徐公脩道功成以鐵錐
刺穴白鶴飛出駕之上昇又五里有玉峴山舊名
黃石山唐天寶勅改今名山中洩水九層沿崖下
注如白練東南有鐘乳穴伏翼如鷲又五里有浮
門南陳末國亡盡室避亂于此宋紹興中漁者于
海上得一琴其腹間題云臣雷某造以獻于朝高
宗視之垂涕乃建炎時航海所失者也又十五里

有合旗山舊傳僧灌頂居此會海寇至灌頂誦經自若寇見山上旌旗隱燿遂懼而遯故名又二十里有岫門山山腹一穴上達于頂有聲則風起水湧且有兵又二十里有龍符山吳越春秋夏王祭此得龍符者也山形似覆釜一名覆釜山山上有巨人足跡相傳夸父逐日所踐又東二百里有芙蓉山智者禪師傳云出海口望之若芙蓉之始開也折而南五十里有白山遠望如雪其上有湖嘗旱不竭雨不溢有芙蓉洞形如二石鼓相連亦名穿岩○方輿記云新羅嶼在縣東南三十里以新

羅貢人艤舟于此故名又四十里爲石新婦山山旁奇石糾色狀如婦人劉宋文帝遣畫工模寫其像時人效之競圖于白團扇山前有九井又五里爲九盤山其路縈迴九轉絕頂可望大海又迤南二十五里有亭山由郡泛舟入黃岩者候潮于此又折而東二十里爲金鼇山東有小澗昔人夜艤舟山下者見有光彩近視之乃一金色巨鼇宋建炎四年金人入寇高宗航海嘗泊此山留四旬聞捷書至始還越州又六里曰海門山東枕于海相對如門又四里有赤山其絕頂古塔下有石函貯

台州府志卷之六
舍利又東有翠環山與主山峻嶸山相望多居民
田廬又北有仙岩廣高數百仞中通十竅廣四畝
名百花洞有石泉深尺許金鷲翔集之所其下有
溪水亦金色又二十里分路入高麗國一峯突立
如人首名曰高麗頭已上諸山皆在海中○縣東
北二百四十里有牛頭山唐天寶六年以其瀕海
勅改臨海山從縣名也

黃巖縣

在府東南
六十里

寰宇記漢順帝永和元年析章安地置永寧縣乃
今温州府之永嘉至唐上元三年復置永寧縣則
今之黃岩而改名則天授之元年也以縣西一百
二十里黃岩山爲名山頂有黃石一名仙石山黃
巖溪之水出焉溪旁亦有黃石五區如相拱揖宋
孫應時詩得雨溪聲壯無風雲氣多山花依翠竹
灘石亂寒莎縣治北有黃山樓宋叅政樓鑰書○
永寧江有二源大源出塵山東南流至左溪村小
源出黃岩山東北流至溪與大源合經縣北東流
入海○永寧山在城東五里以古有永寧縣而名
石壁峻峙四望皆方一名方山又十里有大仁山
山巔有二池清泉澄澈大旱不涸○委羽山在縣

南十里世傳劉奉林于此控鶴輕舉鶴墜羽翮故名宋范宗尹有當年孤鶴知何處遙想天風墜羽翰之句一名俱依山王十朋詩依山積翠日開屏羽客逍遙此閉扃早起留雲閒放鶴夜來伴月靜看經岩前方石應多好竈裏丹砂且是靈應有赤城鸞鳳過一聲長嘯入青冥○山之東北有洞道書為大有空明第二洞天嘗有道士秉炬入洞行兩日不可窮聞櫓聲乃返洞側產方石周正光澤五色錯雜雖琢磨不過是小大百碎亦無不方欲得之者必累糧撮許散洞口隨意拾上土皆有石在上中不然絕不可得又嘗有仙女當月夜自洞出逍遙松林竹橋之下或扣里人門求水火○又十五里為雞籠山山形如雞籠每星月晦冥有光燭天人以為怪不敢居一日晶彩晝見或視之金玉彌山谷往取即滅又十里有唐嶺嶺有古城外城周十里內城半之有洗馬池九曲池及故宮基址相傳為徐偃王城城東有偃王廟○靈岩在縣北十里又名鷲峯後有飛瀑垂崖而下石根插水瀦而為潭深不可測○松岩在縣西十五里沿崖而上凡七里始登石梯梯數百級勁直如削名曰

古仙百步或云王仙姑輕舉之地其上平廣多古松又三十里爲靈石山山有佛寺晉末孫恩寇亂毀其林木爲舡山忽墜石傷賊故以靈名又有丹崖山崖石俱赤有金銀星世傳仙人煉丹于此有池深尺許名丹井○靈石山上有教忠崇報寺東晉隆安二年建舊傳有僧誦仁王經而其露降遂名露山有隋智顛繙經臺唐李義山著書堂○又十里爲三峯山下峯兩山夾一水而入至中峯兩石蹲踞號石門前有大溪石柱屹立于中又四里至上峯有洞空濶尤勝三峯皆山少田居人以造楮爲業○三童山在縣西南十七里上有三峯各高數丈狀如童子三童溪之水出焉東流十八里入永寧江折而西曰岱石山旁有巨石如人俗名大人山山側有岱石潭又西三里曰鳴山每祈禱輒聞飄風驟雨之聲下有鳴川潭又名藏雪潭○瑞岩山在縣西北四十五里山石皆紫色舊有如意道人居之絕粒菴前有滴滴泉泓潔可愛宋楊傑詩岩谷連天嶺松杉徹象山路從雲外入人自海邊還禪榻紅塵斷經窓白晝閒玉蓮生有處香滿翠微間○輿地碑目縣西北有定光觀吳黃武

中建前有二池葛玄嘗以其一煉丹水特清大旱不涸每有靈怪蕩激而起其波高數丈○晉井在縣治內磚上有太和二年字○塚記云晉王昏墓在縣南之樓崎山墓甃螭形魚文貫以柳或為錢狀旁有文云晉永和十二年○唐李公亮墓在縣南一十五里○宋杜範墓在黃杜山○車若水墓在謳韶○章敦禮墓在黃壘○謝克家墓在縣西五十里○黃巖志十六卷永嘉蔡範甫撰嘉定甲申歲

天台縣在府西北九十里

三國吳析章安置南始平縣此縣之始也晉武帝

以嫌于雍州之始平改名始豐唐高宗改名唐興五代朱梁始改天台○按志天台山在縣北三里自神迹石延袤國清赤城桐栢至于華頂皆名天台實一邑諸山之總名陶隱居真誥云高一萬八千丈周迴八百里山有八重四面如一當斗牛之分上應台星故曰天台赤城者土石皆赤遙望如城述異記云赤城一峯高可三百丈丹壁爍日山麓有岩方廣其下為深淵晉義熙初僧曇猷至此忽有人負而投于淵者猷飛錫救之水立涸今之乾溪是也既住此方誦經猛獸巨鱗交見猷不為

動俄有神詣猷遜謝願他徙于是鼓角凌虛而去
齊僧慧明繼至塑卧佛并曇猷像于岩中因名卧
佛岩又有二岩曰結集曰釋籤乃梁僧灌頂道場
也西有玉京洞蓋十洞天之第六茅司命真君所
治徐靈小錄云其下别有洞臺方二百里魏夫人
所治中有日月二辰瑤花芝草今洞口有石刻玉
京字宋余爽玉京洞詩東臨滄海宴群仙誤入桃
源小洞天一局碁殘油幾刻老龍鬚甲已蒼然□
自赤城而北至佛隴岩梁僧定光隱三十年人無
知者智覲在江陵夢被光引至山巔曰汝當住此
及覲至佛隴光曰憶昔招手言否顛乃悟光曰金
地吾已居之爾宜往銀峯今有金地嶺銀地嶺是
也□踰十里至石橋兩崖門立石橋橫亘其上廣
不盈咫而山北左右肩有雙泉飛流至橋始伏伏
出仍瀉爲瀑可百餘尺掛岩石間自下視之石橋
在半天而墮雪之溜空中轉擊潭水聲震林谷西
域記云佛言震旦天台山石橋方廣聖寺五百大
羅漢所居天台記云橋長七丈北濶二尺南濶七
尺龍形龜背中有尖起丈餘莓苔甚滑難度孫興
公賦踐莓苔之滑石是也橋頭有亭曰曇花亭石

罇有木瓜華蛇時來盤糾至實落供大士乃去號
爲護聖瓜口國清寺有五峯正北曰八桂東北曰
靈禽東南曰祥雲西南曰靈芝西北曰暎霞前有
雙澗合流南注大溪其下爲國清寺乃智覬禪師
台山十八刹此爲定光授記第一道場普明禪師
初止寺之半岩難于得泉以杖扣石而泉湧出今
爲錫杖泉唐豐干亦居此寺形貌寢愚被髮布裘
與寒山拾得相親長吟大笑人莫測也貞觀中太
守閻丘胤問于天台有何聖賢干曰國清寺寒山
拾得貌顧風狂蓋普賢文殊後身也閻丘至寺二

人方據火談笑閻丘遽前揖之二人云豐干饒舌
遂搖手出門而去皮日休詩十里松門國清路飯
猿臺上菩提樹怪來烟雨落晴天元是海風吹瀑
布陸龜蒙詩峯帶樓臺天外立明河色近杳愚濕
松間石上定僧寒半夜檣溪水聲急杜荀鶴詩一
到天台寺高低景旋生共僧岩上坐見客海邊行
野色人耕破山根浪打鳴忙時向閒處不覺有閒
情○玉霄峯卽洞天宮也在縣北三十五里重崖
疊嶂松竹葱蒨產香茅劔南詩稿云予所領崇道
觀在天台玉霄峯下舊有小閣臨官道傍予命曰

玉霄閣仍為詩云竹輿衝雨到天台綠樹陰中小閣開喚作玉霄君會否要知小吏按行來○白雲峯與玉霄相對古有白雲先生唐司馬承禎隱此亦號白雲子嘗應睿宗召出山之東北而悔因名曰司馬悔山在道書為第十六福地雲笈七籤載司馬悔山在天台山北李明仙人所治又北為靈墟則白雲先生棲止處世說王右軍得筆法于白雲先生是也○過金地嶺折而西北有寒風闕兩崖如城巨石踞其表罡風蓬蓬驅石欲舞人行不成步盛暑披裘而慄由闕東而上為華頂峯乃山之第八重最高處少晴多晦夏猶積雪中有石洞絢采光明竒怪萬狀華頂者自下望之若蓮花之萼亭亭而獨秀也峯之下有察嶺亂石為峽乃漢徵君高察隱處又數里下雙溪上天柱峯轉峯左三里許上下二深池池中為馳道傳云秦始皇由此登山以望海絕頂有王右軍墨池李白書堂及智觀禪師降魔塔禮經壇唐李紳華頂峯詩欲向仙峯煉九丹獨瞻華頂禮真壇石標琪樹凌天碧水掛銀河映日寒天外鶴聲垂絳節洞中雲氣隱琅玕浮生未有從師路空誦仙經想羽翰皮日休

詩青冥向上玉霄峯元始先生戴紫蓉曉案瓊文
光洞壑夜壇香氣惹杉松閒迎仙客來爲鶴靜喫
靈符去是龍子細捫心無俗骨欲如師去肯相容
陸龜蒙詩天台一萬八千丈師在浮雲端掩扉永
夜祇知星斗大深秋猶見海山微風前幾露青毛
節雪後應披白羽衣南望烟霞空再拜欲將飛魄
問靈威○明岩在桐栢山下初入如巖肩深邃石
竇嵌空樓閣半在岩間不復覆以茅瓦卽石成簷
洞口有帽影馬跡俗傳太守問丘胤謁寒山拾得
于國清寺二仙出門去追及至此因拍手笑入岩
岩遂闔閭丘亦晚于此崖上飛泉百丈以鐵索斜
接之居者不煩遠汲又北行三里餘至寒岩石壁
高數百丈爲屏爲洞容數百人夏至不見日影一
石方正則寒山子宴坐處西臨絕壑爲天橋堂宇
皆置岩下寒山子本無名姓以其居寒山石故以
爲稱僧皎然詩衆山搖落盡寒翠正重重卽此處
也寒山子容貌枯悴布襦零落時來國清寺就拾
得取衆僧殘菜滓爲食或時叫嘯望空謾罵出言
如狂嘗得詩題樹石間好事者隨錄之得二百餘
首拾得亦無名姓豐干和尚于赤城道側聞兒啼

聲函拾得之故以爲名長爲國清寺厨頭滌器每
齋畢澄濾食滓以筒盛之寒山來卽負之去郭三
益寒岩詩道人棲碧山雲居在空曲十年海潮音
外物緣已熟時携貝葉書步入深林讀宵眠護禪
虎書引穿花鹿菴中三昧語藥我貪嗔毒何當脫
雙屨藜杖追高躡桐柏山在縣西北二十里周
圍九峯曰紫霄曰翠微曰玉泉曰卧龍曰琪樹曰
華琳曰玉女曰玉霄曰華頂司馬承禎旣應召出
復還棲隱于此山北有金庭館許邁與王逸少書
自山陰至臨海多有金庭玉堂仙人芝草是也又
三里爲雲峯上多平疇間以陂池唐徐靈府隱焉
會昌初累徵不起寶曆初賜峯名方瀛又二里曰
瓊臺山轉南三里曰雙闕山兩峯千仞屹然相向
宋祥符中山人張無夢結廬于此真宗召越闕講
易并還元篇除著作卽不受寒山子寒山詩重岩
我卜居鳥道絕人跡庭除何所有白雲抱幽石住
此凡幾年屢見春冬易寄語鐘鼎家虛名定無益
又登陟寒山道寒山路不窮溪中石磊磊澗澗草
濛濛苔滑非關雨松鳴不假風誰能超世界共坐
白雲中宋洪适前題峭壁插青冥層岩覆化城空

中清磬發幽處慧燈明萬瓦是雲氣四簷無雨聲
豐干不饒舌此地孰知名唐孟浩然桐栢觀詩海
泛信風帆夕宿逗雲島緬尋滄海趣近愛赤城好
捫蘿亦踐苔輟棹恣探討息蔭憇桐栢采秀弄芝
草鶴唳清露垂雞鳴信潮早願言解纓紱從此去
煩惱高步凌四明元蹤得二老紛吾遠游意學彼
長生道日夕望三山雲濤空浩浩鄭薰前題深山
桐栢觀殘雪路猶分數里踏紅葉全家穿碧雲月
寒山嶂曉風遠蕙蘭芬明月出林去吹笙不可聞
元積中詩九峯魏絕亂雲屯石室瓊臺舊址存山
險密盤之字徑洞深高闕丙方門碧桃花爛春溪
暖紫玉簫沈月榭昏未覺臺中光景晚人間歸去
見來孫○東橫山俗名覆船山本天台山足其山
坦夷中有三溪冬溫夏冽右去縣東十里其地有
鳳凰山卽孫綽觀翔鸞之濟濟聽鳴鳳之邕邕者
也唐許渾宿東橫瀨詩孤舟路漸賒時見碧桃花
溪雨灘聲急岩風樹勢斜獼猴垂弱蔓鷓鴣睡橫
槎漫向山林宿無人識阮家○丹霞洞去司馬悔
山二里上有仙人拍手岩飛瀑數十丈下注爲靈
溪唐刺史柳泌于此煉藥宋劉昭禹靈溪詩鼇龜海

西邊地宵吟景象寬雲開孤月上瀑噴一山寒人
異髮常綠草靈秋不乾無由此棲息魂夢在長安
○桃源洞在縣西北二十二里一名劉阮洞漢永
平中劉晨阮肇二人入天台山採藥迷道得桃實
食之遂覺身輕下視岩溪中盃盤茵褥浮溪而下
行數里見二女方笄笑迎以歸留半載謝去至家
子孫已七世宋景祐中僧明照亦因採藥見金橋
跨水光彩眩目亦有二女戲于水上始水仙之洞
府也唐元稹詩仙洞千年一度開等閒偷入又偷
回桃花飛盡秋風起何處消沈去不來又芙蓉脂

肉綠雲鬟畫樓臺青黛山千樹桃花萬年藥不
知何事憶人間曹唐詩樹入天台石路新雲和草
淨迥無塵烟霞不省生前事水木空疑夢後身往
徃雞鳴岩下月時時犬吠洞中春不知此地歸何
處湏就桃源問主人○宋景祐中僧明照亦因採
藥恍然如劉阮所見乃疏鑿爲亭邑令鄭至道卽
其景物隨處命名如鳴玉澗桃花塢之屬仍自爲
記右去縣西北二十里○瀑布山一名紫凝山與
瑞龍天柱香鑪應澤四峯相望山之瀑布千丈陸
羽品爲天下第十七水與國清福聖二瀑爲三神

異記云餘姚人虞洪入山採茗遇一道士牽三青羊引洪至瀑布山曰吾丹丘子也聞子善具飲常思見惠山中有大茗可以相給○志云大溪在縣西南源出婺州之東陽以其受始豐天台桐栢之水故以大名○始豐溪在縣西源出大盆山東流合天台桐栢二水入于大溪按大盆山在縣西一百八十里西接東陽南界仙居遙望山形如覆盆卽婺江之源也二溪各去縣數百步○靈溪在縣西北三十里卽孫綽賦過靈溪而一濯者又二十里爲銅溪其水黃色狀如銅汁故名唐鄭巢靈溪

館詩孤吟疎雨絕荒館亂峯前曉露棲危石秋萍滿敗船溜從華頂落樹與赤城連已有求閒意來期在暮年○栢溪在縣東三十里一名油溪晉束皙啟蒙記注云入天台路經油溪水深險清泛前有平橋路徑不盈尺長數十丈下臨絕澗惟忘其身然後能濟再折而北爲九折峯僧智顛宴坐立道場處孫興公賦旣克濟于九折路威夷而脩通○輿地碑目云天台觀葛仙翁篆晏公類要以吳赤鳥元年葛仙翁所建其篆額卽仙翁親筆○栢栢山金庭館記集古錄云南齊沈約造兒珪之書

永泰中因地名建館曰金庭宮置道士十人蓋道士自叙之言非約所撰其謂之造者疑如後世立碑之類龔碑以永元三年立○桐栢觀勅唐景雲二年立桐栢頌唐崔尚擢文韓擇木八分書碑天寶元年立○脩桐栢宮碑唐元禎撰顏顥書景雲中道士徐靈府等重葺碑以太和四年立○國清寺記唐柳公權書額○佛窟禪師碑唐太和六年立○天台禪林寺碑唐元和六年立智者大師脩禪林道場碑唐元和二年立俱在大慈寺○禪林寺智者大師畫讚大曆中顏真卿文右俱不存

仙居縣

在府西九十里

輿地志云晉永和三年分始豐縣南鄉置樂安縣自是屢廢屢置至五代錢氏改名永安宋景德四年改今名晏公類要云王姥山在仙居縣界亦名天姥山相傳古仙人所居○岩老堂宋皇佑間令陳襄建陳在仙居嘗鑿池引水流遶竹林因以釣翁名臺習坎嘉魚名亭其詩云手持養性書此地學樵漁身類龍蛇蟄情深木石居先迷成遠復正靜得中虛何必求深隱幽蒙是所廬徐融和云大老富詩書不煩耕與漁岩同傳說築人學仲尼居

靜性觀三極窮神味六虛欲知休復意仁義是蘧廬○福應山在縣東二里形家以邑居龍首得地之勝陳公述古因命今名朱晦翁更名盡美紹熙中建盡美亭于上張景脩記云仙居邑之美者也而一山盡焉福應山之美者也而一亭盡焉盡美于亭者非盡一山之謂也盡一邑之謂也又東十三里有石室深三丈廣一丈名龕山迤南曰峽山衆峯拱列溪澗紆回以其可方瞿塘三峽故名○綵仞山在縣北二里其下有溪又西一里有陽公岩岩之洞高廣如屋折而北二十里有紫籜山舊名竹山唐天寶中明皇夢一人紫服而朝自稱竹山神來獻瑞鳳明日果有鳳來翔遂賜今名○南峯去縣三里上有興道院院內有浮圖俗呼南塔及涵清亭藍光趨稼二軒下瞰大溪又折而東二里有安洲山舊名管山亦名九旬山上有潭唐武德初高僧灌頂講經于此是時山在水中波瀾四絕漁者甚衆師勸止之漁人不聽忽一夕風雨大作旦則爲洲故更今名又二里有漁潭山又二里有枕溪山又二十里爲括蒼山重岡複徑隨勢高下有洞曰成德隱真乃十大洞天之一唐劉昭禹

詩盡日行方半諸山直下看白雲隨步起危徑極
 天盤瀑頂橋形小溪邊店影寒往來空太息玄鬢
 改非難○瓏崆山在縣西南十五里山多玲瓏巨
 石其岩石峭白者曰白岩山水自層岩飛瀉者曰
 淙水岩又十里有麻姑岩巨石豁舒矯如人立又
 十五里有水簾山山瀑若簾垂四時不竭又五里
 有萬竹山絕頂為新羅嶺以可望新羅國故名宋
 左丞薛昂避寇于此有詩云萬竹山中數十家重
 重流水繞桑麻飽餐鼓腹成何事桃李春風任自
 花○靈山在縣西二十里上有淨梵院舊志云禽

鳥不敢棲故山以靈名又五里曰張阜山東瞰縣
 治南環以溪泉谷深秀舊傳逸民張阜居焉內有
 潭亦曰張阜潭其側又一沙潭每潮長則水浸沙
 石潮退復平近有雲峯峯有小洞雲出其中故名
 唐許渾詩西岩一逕不通樵八十持盃未覺遙龍
 卧石潭聞夜雨鴈移沙渚見秋潮經函露濕文多
 隱香印風吹字半消應笑東歸又南去越山無路
 水迢迢○輿地碑目云唐金像寺在仙居縣西三
 十五里有石幢巋然歲久剝落惟存垂拱三年立
 等字○又十五里為玉几山山之東有項羽山山

之西有瑤崩瀑源出項羽山流爲三潭潭之下有
岩壁立瀑緣壁而下或雨初霽則飛流濺沫廣至
數丈相近有景星山其高萬仞上有鹿頸岩以形
似而名長數丈平曠可行左右崖壁削峻絕不可
登又相近有韋羌山山甚深僻石壁上刻科斗篆
文又十里有運羌山亦名天姥又五里有枕海山
與潮汐相接陳襄韋羌山詩去年曾覽韋羌圖云
有仙人古篆書千尺石岩無路到不知科斗是何
如○志云蓼溪在縣西二十里南溪在西南二十
九里方溪在縣東左溪在縣西各去一百餘里此
四溪之源皆出永嘉杉岡又有櫟溪在縣西二十
里源出處婺温三府界又六十里爲土瀆溪源出
紫岩山凡此六溪皆北流入于大溪○班溪在縣
東五十八里源出天台竹山柘溪在縣西六十里
源出馬嶺真溪在縣西一百七十里源出馮師山
凡此三溪皆東流入于大溪○彭溪在縣東二十
里白水溪在東北四十里其源皆出天台馬嶺溪
在縣西六十里又十里有瞿溪又三十里有石井
溪其源俱出東陽○曹溪在縣西九十里又十六
里有朱溪哈裏溪又七十里有慈溪其源皆出蒼

嶺凡此九溪皆南流入于大溪○廟記云蔡經宅
在縣東南二十里經吳人遇王方平學道于此人
爲建宅曰隱真宮○慈感廟在縣北六里祀杜氏
二女唐天寶間縣令鍾離介記畧云二女生隋大
業末有庖人挑之二女憤激殺庖者去而之孟溪
隱會溪溢死焉介得第將授仙居女現夢之長安
即中

寧海縣

在府東北一百八十里

輿地廣記晉析回浦鄞二縣地置寧海縣旋廢唐
末元中復置○輿地紀勝云三瑞堂在寧海縣主

簿廳西時簿官洪皓以荷花桃實竹幹有連理之
瑞已而生子适故以三瑞名适長以貳車行縣題
詩云久矣馳菟夢今登三瑞堂故山有喬木近事
話其棠展驥慙克位占熊憶問祥白雲留不住極
目是吾鄉○交翠亭亦洪皓建子适有詩云三十
年中事鸞棲築小亭寒聲長新籜清閤拂疎櫺水
轉前時綠山儂遠處青重來勤問訊此別記秋螢
○讀書徑在西圃唐令薛抗建初名風漪戎昱寄
詩以出宰山水縣讀書松竹林爲韻乃更今名○
卧龍山在縣東南一里山勢蜿蜒如龍偃卧故名

舊有鶴林菴又里許有千丈岩壁立高峻其下爲
青鏡湖○白嶠山在縣東五里晉武帝初置寧海
縣于此又里許有石臺山山上數石屹立如臺故
名又四里有杜鵑山以山多杜鵑花春日開如錦
繡又十五里有瀛岩濱于海崖嶿險絕下蘸波心
宋縣令高襲明書瀛岩二字刻于石壁無名氏詩
温台萬丘壑走徧成重厖佳山落床頭咫尺反不
知我聞野老說山乃神所移蓬萊本三峯一峯今
失之上布雲霓秀下壓鼇背歛夜半見海日紫暈
開咸池魑魅着老木狂飈向人啼危亭無遺棟絕
壁無舊題夫子勇過我竦身敢獨躋我病不能從
夢寐常追隨秋風海上來霜清鱸正肥行尋越溪
鞅肅此塵外鞵○五龍山在縣治北新河城垣橫
亘其上宋陶昭構書室于山趾繪淵明小像于壁
晦菴朱子題曰慧遠無此冠靖節無此巾此巾要
亦有無此漉酒人元盛聖泉詩塵居趣自幽脫巾
掛龍石浮雲宿簷端幽篁翳暝色萬卷伊吾聲半
山燈火夕笑談紫陽詩躋攀謝公屐皓鶴唳海東
月明松露滴○五龍之右爲鎮岩山有石壁二高
廣四丈古刻漫漶不可辨惟見顏真卿姓字岩前

有小石井久旱不涸越十里爲大中山當縣後正中形若屏障又二十里爲赤柱山有闔雞岩兩巒蒼鴈蒼者以山上有石如鴻鴈也又三十里爲天門山漢地里志鄞縣之南寧海之比有天門山入于海蓋此山從嵒刻發足繚繞三百餘里其麓有閭風臺拔起數千仞旁有香岩石井釣臺諸勝又二十里曰張山上有石鏡又東北十里曰蓋蒼山一名茶山瀕于大海柴溪之源出焉上有石刻真逸二字相傳陶弘景嘗居此真逸弘景號也○摘星

嶺在縣南二十五里舊名新嶺以其高峻更名摘星宋盧駿元詩自知牛鬪耳不柰晚猿何客髮愁中老秋山別後多扁舟桃葉渡夜雨竹枝歌賴有盧仝盃時堪戰睡魔其二已知星可摘湏信路皆通

日影穿雲薄天形入水空遙看梁苑雪猶挹楚臺風指點中華地山河萬國雄○崇教寺在縣西山相傳王逸少許玄度所游宋左緯詩只把山爲界紅塵自此分竹窓吟聽雪苔石坐看雲意靜詩先到心清道自聞深慙王許輩猿鶴舊同羣○梁王山在縣西二十五里梁末侯景作亂陳霸先兵起

梁有王子避地于此又十里爲白龍潭崇巖插空其下有潭白龍所潛又五里爲桐栢山連接天台卽司馬承禎棲隱處也又五十里爲鹿頭峯以形似而名亦與天台接界舊經云昔有人登其巔西望林壑中隱隱數家冬有花如桃李及卽之已迷其處○紫溪洞在縣西北四十里幽阻險隘唐天寶間袁晁據浙東李光弼率師擊斬之晁弟瑛從五百騎遁入洞中光弼駐兵洞口絕其糧道賊竟餓死至宋岩石中尚有遺鏃又十里爲王愛山界于天台咸通中剡寇裘甫據寧海懿宗遣王式發兵討之甫從此山遯去通鑑謂黃罕嶺者誤也又西北五十里有硤石門山兩峯夾起矗立千仞又有龍鬚山山岡四斷怪石屹立有三龍湫○靈鳳山在縣南七十里又二十里曰獅子山絕頂有巨人跡世傳神仙隱跡相近有丹丘孫綽賦訪羽人于丹丘尋不死之福庭是也宋林景熙靈鳳山詩目澹梧枝洞鎖苔人間矰繳幾驚猜九苞自是冲霄物曾爲簫韶一出來又巨人跡詩仙子渾無涉世勞屨痕一尺寄孤高幾人失脚風波裏可是雲根並得牢○又十里爲仙岩山絕頂二石如人偶

坐石洞多奇草靈藥相近有危橋嶺二石峙立如門其下泉流湍急又有與湖岩噴岈獨秀高插霄漢外環以湖如石貯盆中又有東郭岩秀石岸嶸漚爲一區雖盛夏涼氣逼人○迤東南有龍母山山有秋水潭一名玉溪宋郡志吳尚書屈晃生子坦坦偕其母自大固山徙隱于此坦尋化爲龍母亦屍解塋其處○大龍嶺在縣西南一百里廻旋曲折凡三十五盤又二十里有壽星岩狀如老人一名老人山相近有桐岩嶺舊路由狼坑紆廻阻滯宋靖康後取道于此至今便之○海游溪在縣南四十里又有上白溪小豔溪東溪寧和溪皆繞流縣城外有廣度河又東有淮河西有吳溪皆東流入于海縣北有白渚溪馬紫溪皆東北由鄞江入于海○志云黃氏讀書堂在平洞村宋邑人黃軻建葉適詩誰能採桑談誰能帶經鋤古人讀書地妙理出窮閭矧今治華屋山翠擁前除風煙聚景趣花草成畫圖主人烏紗恰子弟繡羅襦新裝蠶紙印上記開闢初展卷忽有得欣如奏齊竿勉哉造其微勿逐皮毛麤

太平縣

在府東南一百四十里

皇明成化五年分黃岩縣南三鄉置太平縣十二年又分樂清縣下山六都以益之○志云百千山在治北乃縣之攄山也其西北曰官鑑山東五十步曰鳳皇山南一里曰石牛山曰鶴鳴山天馬山石磐山有瀑布泉注為石潭者三○五龍山在縣東南八里一名石夫人山又名百丈岩岩石聳立大可百圍狀如婦人宋郡志昔有人漁于海濱不返其妻携七子登高望之感而成石下有七石人蓋其子云山麓有消山消湖消村寰宇記謂山北湖陰有蕭御史廟故俗訛蕭為消又有湖曰橫湖

凡東南溪流三十有六皆會焉與五龍山相接有錦屏山奇石峭立如屏每春夏花開燦爛如錦故名有岩曰卓筆曰搶珠曰仙局曰玉樓曰侍者皆屹立如人又二十里為松門山王羲之游西郡記云永寧縣界海中有松門島巔上皆生松即此○晉源山一名雪山在縣東三十里有百丈岩羅漢洞智者泉碧蘿潭相傳昔晉王居此山下有小牌曰晉王游適之地○大雷山在縣南十七里高千餘丈週迴三十餘里上有龍湫又南三十里海中有玉環山靈山二山相連其峽如門名楚門港海

船由此出入○中嵩山一名溫嶺在縣西十里有
東西兩峯東大西小俗名大嶺小嶺常燠少寒路
通樂清縣稍南曰龍鳴山上有龍湫又西二里曰
西原山一名西山絕頂有丹竈丹井唐張兆期藏
脩于此又西十三里有湖霧山屹立湖側西連鴈
蕩北接唐嶺常有海氣升騰如霧故名又西北二
十里曰婁崎山一曰樓旗山雄峙霄漢海舶視爲
嚮導山頂有龍湫其下產石米通明如雪又西北
十三里有王城山一名方城王羲之游西郡記云
臨海南界有方城山絕巘壁立如城相傳越王失
國嘗保此山唐天寶六年改今名中有漁翁岩獅
子岩石柱峯仙人濯足灘爛柯石雞母石平霞嶂
露臺石牛舂隴水簾天窓諸境山頂平曠約百餘
畝居人墾而耕之號仙人田下有桃溪○大唐嶺
在縣西北四十里下有溪南流至白箬灘入河由
唐嶺分支東南行十里許曰靈伏山山形如龍布
爪而伏上有龍湫其西有玉山山巔有石色白而
潤又五里有盤山界于黃岩宋王十朋盤山詩一
嶺迢迢十里餘行人終日踏烟霞青山遮道盤千
匝歸夢何曾不到家○迂江在新河城外濶二里

凡水鄉月河及山谷諸水皆至此入海溫嶺江在
溫嶺南俗稱江下南出楚門港入海凡海艦西去
溫州樂清北去台州黃岩皆艤泊于此大閭港在
長沙海口南有驪洋其下有驪龍窟出此則茫無

畔岸矣○文獻通考載滕公守台州卷之六 卷之六 卷之六 卷之六 卷之六 卷之六 卷之六 卷之六 卷之六 卷之六

膚字子勤為台州戶曹方臘之亂仙居人呂師囊
應之攻城其亟膚佐太守極力備禦一城保全郡
人德之至今廟食焉○國初刑部尚書魏澤謫臨
海典史時捕方正學家不許容畱一人公為悉力
營護以出其孤射文肅詩所謂孫枝一葉存者也

澤字彥恩過孝孺故居有筍輿衝雨過候城撫景
令人感慨生之句云

浙江台州府名勝志卷之六

白州府志
卷之六

三



